
Ахборот хизмати: Фарғона вилояти ҳокими Жанубий Корея делегациясини қабул қилди

Ўзбекистон ва Жанубий Корея халқларини қадимий дўстлик ришталари боғлаб туради. Икки халқнинг маданияти, менталитети ўхшаш. Бугун мана шу дўстлик ва ҳамжиҳатлик алоқалари янада ривожланиб, янги босқичга қадам қўйди. Жанубий Корея юксак даражада тараққий этган, улкан иқтисодий, илмий-техникавий, инновацион ва интеллектуал салоҳиятга эга давлат сифатида дунё ҳамжамиятида ўз ўрнига эга. Мазкур мамлакат билан савдо-иқтисодий, сармоявий, маданий-гуманитар алоқалар бугун вилоятимиз мисолида ҳам ўз натижасини намоён этмоқда. Фарғонада яратилаётган қулай инвестицион муҳит корейликларга маъқул келяпти. Жорий йилнинг 9 апрель куни Фарғона вилояти ҳокими Шухрат Ғаниев Ўзбекистоннинг Кореядаги фавқуллодда ва мухтор элчиси Виталий Фен ҳамроҳлигидаги Жанубий корейлик инвесторларни қабул қилди. Қабул чоғида Ўзбекистон республикаси геология қўмитасининг раис ўринбосари Азимжон Каттахўжаев ҳам иштирок этиб, асосий масала Фарғона туманидаги кўмир конида қазилма ишларини олиб бориш ва бу орқали вилоятимизнинг энергетика салоҳиятини юксалтиришга қаратилди. Вилоят раҳбари таъкидлаб ўтганидек, ушбу соҳанинг ривожланиши, қазилма ишларининг сифатли ва кенг кўламда йўлга қўйилиши саноатни, ишлаб чиқаришни янада ривожлантиришга муҳим ҳисса бўлади. Газ ва электр эмас, балки кўмир ёқилғисидан фойдаланган ҳолда ишлаб чиқаришни янада ривожлантириш имкониятлари яратилади. Бу борада эса сўзсиз Жанубий Корейлик мутахассислар ва ишбилармон доиралар вакиллариининг кўмаги, ҳамкорлиги зарур. Барча соҳаларда, айниқса, энергетика, саноат ишлаб чиқариши, шунингдек, геология соҳасида ҳам имкониятларинингиз катта эканлигини яхши биламиз. Ва ушбу йўналишларда ҳамкор, ҳамжиҳатликда бир қатор лойиҳаларни амалга ошириб келганмиз ва бу лойиҳалар, Ангрендаги кўмир конларида, геологик қазилма ишларида ўзининг ижобий натижаларини бермоқда, дея қайд этиб ўтди суҳбат асносида геология қазилма ишлари бўйича халқаро менежер КИМ САНГ Ю.- 19 апрель куни вилоятинингизга Корейлик икки нафар мутахассислар етиб келади ва тадқиқот ишларини олиб бориб, коннинг ҳолати бўйича барча маълумотлар базасини яратади. Ўйлайманки, вилоят заминида, хусусан, Фарғона туманида халқининг фаровонлигига хизмат қиладиган сифатли кўмир захиралари мавжуд ва биз ушбу конларда тез фурсатда қазилма ишларини самарали олиб борамиз. Албатта бундай келишувлар, шартномалар вилоятимиз иқтисодиёти янада тараққий этиши йўлидаги муҳим қадамдир. Томонлар лойиҳанинг техник-иқтисодий асослари хусусида ҳам атрофлича фикр юритдилар. Вилоят ҳокими Шухрат Ғаниев қайд этиб ўтганидек, мақсад ушбу йирик лойиҳани тез фурсатларда сифатли тарзда ишга тушириш ва вилоятнинг саноат салоҳиятини юксалтиришдан иборат. Бу борада Корейлик йирик инвесторлардан бири Ким ЁН ГУ ҳам ўзининг фикрлари ва режалари билан ўртоқлашди.

2019-04-11 19:10:11